

Noticia
Transparente
di Gobierno

ISLA ONLINE

Dialuna 25 November 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PLANTA SEWAGE TREATMENT PLAN (STP) NA PARKIETENBOS A WORDO RENOBADA Y TA REANUDA OPERACION

"Servicio di hiba desperdicio ta completamente gratis y optimal"



Dialuna mainta Prome Minister Evelyn Wever-Croes tabata presente na e planta Sewage Treatment Plan na Parkietenbos pa reanudacion di operacion di e facilidadnan. Prome Minister a indica cu pa falta di mantencion di e facilidad, esaki no por a procesa e desperdicio cu tabata yega. Pa e motibo aki e planta a wordo sera na Maart 2024.

Gobierno, mirando e necesidad grandi pa pone e planta aki den funcion, a tuma e decision di privatisa e planta y pone den man di un compania cu tin e capacidad pa inverti y drecha e planta. Gobierno a logra pasa e ley di privatisacion den parlamento y traspasa e propiedadnan pa Aruba Wastewater Sustainable



Solutions (AWSS) cu lo encarga nan mes di haci inversionnan necesario.

Prome Minister a indica cu esaki sigur ta un dia importante, mirando cu pa esnan cu ta hiba e awa, specialmente e trucknan di septic tank, esaki ta un alivio grandi ya cu nan no mester bay te Zeewijk mas pa haci esaki. Cu e planta aki habri, e trucknan di septic tank por hiba e sushi na e planta completamente gratis y haya un servicio ta optimal. Cu e machinnan den fucion atrobe, por procesa e sushi sin causa molester caul ta e direccion cu Aruba kier bay.

"Mi ta contento di wak e prome producto di e privatisacion, specialmente asina liher mirando cu normamente e ta tarda un poco mas. Tin aworaki un solucion urgente cu nan a aplica y den 1 of 2 aña ful e planta lo ta cla, y lo haci cu e holo di Bubali Plas ta pasa pa pasado.

Mi kier a gradici AWSS y cada trahado di e compania pa nan esfuerso y trabounan duro pa cu e planta aki, y pa tuma e encargo di no solamente tuma e facilidadnan cu tabata den hopi mal estado, sino tambe traha y mehoranan. Masha pabien y hopi danki" Prome Minister a expresa.



MINISTER MADURO DI CULTURA A HONRA VARIOS TOCADO DI CAH'I ORGEL RIBA DIA DI MUSICO

Riba Dia di Santa Cecilia patrona di tur musico conoci como Dia di Musico, na Fort Zoutman Departamento di Cultura a organisa un bunita encuentro na unda a reuni varios baluarte tocado di Cah'i Orgel hunto cu nan famia y nan caha pa asina nan por wordo honra pa Minister Maduro di Cultura pa nan esfuerso pa tene nos folklore bibo atraves di musica di Cah'i Orgel.

Discurso cu informacion riba Cah'i Orgel

E anochi a cuminsa cu un discurso di sr. Arthur Kelly riba e historia di Cah'i Orgel na Aruba, sigui pa un splicacion detaya di sr. Elias Halabi di e proceso con ta traha un Cah'i Orgel, despues a sigui un splicacion y presentacion di bailenan folklorico door di sr. Ferdinand Franca, y a cera e prome parti di e anochi cu un bunita poema dedica na Cah'i Orgel declama pa e hoben Tai Kong Trimon.

Discurso Minister di Cultura pa honra baluartenan

Despues di un pauze den cual a resona musica di Cah'i Orgel, Minister Maduro di Cultura a hiba palabra pa asina repasa e lista di tur e baluartenan cu a ricibi un reconocimiento riba Dia di Musico. E mandatario a reconoce e Cahanan di Orgel cu tin mas cu un siglo activo, e baluartenan cu ta preserva e tradicion di Cah'i Orgel y un grupo di hoben cu ta dedica na toca Cah'i Orgel y Wiri inspirando otro hoben pa nan tambe sigui cu e bunita tradicion aki.

Cahanan di Orgel di mas di un siglo activo

Bou e categoria di "Cahanan di Orgel di mas di un siglo activo," a reconoce:

"El Porfiado" di Sr. Minguel Werleman cu ta activo ya pa 119 aña y ta e unico caha cu tin 9 pieza pa cilindro y 37 martiu. E caha tabata tin 5 doño y te ainda ta activo, representando Aruba cu orguyo.

"El Negrito Maldito" di Sr. Rodney Werleman cu tin 118 aña y a bini for di Italia. E caha aki ta un simbolo di constante dedicacion. Rodney Werleman ta preserva su esplendor y ta mantene e tradicion di musica di caha di orgel cu ela hereda di su welo Ale Werleman den feliz memoria.



"El Diamante" di Sr. Higinio Alejandro, miho conoce como 'Patan' Farro, cu tin 109 aña. E caha aki ta un simbolo di constante uzo y dedicacion. Patan Farro no solamente ta su doño, pero tambe su restaurado y un wicharero cu pasion pa e arte.

"El Trovador" di Sr. Roberto 'Roque' Koolman, ta un caha cu yega na Aruba na aña 1920 for di Italia. Roberto Koolman a renoba su condicion y preserva su historia, manteniendo e nomber original di e caha ya pa 104 aña.

"Mi Deseo" di sr. Nelson Tiel, cu ta un caha cu tin 116 aña y a bin for di Novara, fabrica di caha di orgel na Italia aña 1907. E caha tin 4 cilindro y a wordo claba door di Alphonso (Buchi) Boekhoudt.

Baluarte di Caha di Orgel

Como "Baluarte di Caha di Orgel" a reconoce:

Sr. Elias Halabi cu ta trahado di Cah'i di Orgel y clabado di cilindro. Elias ta naci na Corsou, pero residencia na Aruba y ta yuda fortifica e hermandad entre Aruba y Corsou riba tereno di Cah'i di Orgel. Elias ta doño di varios Cah'i Orgel y tambe a traha e Cah'i Orgel "Pequeño Diablito."

Sr. Juan Curiel cu ta dedica na su caha "Nieva Maria", cu a yega Corsou tras un largo proceso y awe ta un instrumento vibrante na varios evento cultural.

Continuacion MINISTER MADURO DI CULTURA A HONRA....

Sr. Nelson Tiel cu ta doño di e cahanan “Istela” y “Mi Deseo.” Nelson e ta honra su famia cu e nombrenan di su cahanan y ta preserva nod historia y tradicion na un nivel superior.

Sr. Denny “Den” Thijzen cu ta un amante di tradicion di Cah’i Orgel cu un historia personal cu “Mi Amor,” su fiel acompañante den ambiente di fiesta y cultura.

Sr. Reginald ‘Nai’ Felicia cu su caha “Bucurui.” Nai ta un amante di e cultura cu ta organisa e famoso festival “Ban Topa cu nos Cah’i Orgelnan,” cu ta uni nos comunidad cada aña den armonia di Cah’i Orgel.

Sr. Ruben Boekhoudt cu su caha “Flores de Colores,” cu ta un digno heredero di un famia di Cah’i Orgel, di cual su creatividad ta refleha den su caha vibrante.

Reconocemento di estimulo

Reconocemento di estimulo a bay pa e hobennan:

Igmar Maduro kende ta e heredero di “Flor di Macubari” y un pionero hoben cu ta skirbi cantica nobo y ta activo na festivalnan di Cah’i Orgel.

Joangelo ‘Giovanni’ Geerman kende influencia pa su omo Esy Geerman, ta dominando wiri y ta preservando e arte cu su propio caha, “Nos Herencia.”

Jeromaine “Jerro” Paesch cu ta domina Cah’i Orgel cu un maestria notabel, tacando regularmente pa uni su famia den nos herencia musical.

Peterangelo Ras cu na aña 2021 a organisa un festival di Cah’i Orgel, “Nos Dushi Caha.” Peterangelo ta un wicharero cu ta inspira cu su pasion pa promove y preserva nos tradicion.

Gradicimento

Minister Maduro ta gradici Departamento di Cultura pa organisa e bunita anochi den cual e baluartenan di Cah’i Orgel por a wordo honra pa nan esfuerso pa conserva y sigura cu e musica y historia di e Cah’i Orgel por sigui rezona y laga nos sinti nos mes orguyoso di nos cultura. E mandatario a finalisa su discurso cu e lema, “Cultura bo tin cu bib’e y cu bo participacion nos ta engrandec’e.”





INCLUSION FINANCIERO TA NECESARIO PA DESAROYO DI ARUBA



Riba 21 di november durante e di dos edicion di Foro di Pago Nacional Minister Geoffrey Wever a elabora riba e maneho den ehecucion pa stimula acceso na y uzo di servicionan financiero pa consumidornan y companianan.

E Foro di Pago Nacional, un iniciativa di Banco Central di Aruba ta un plataforma consultativo entre sector priva y publico cu tin como meta stimula e dialogo riba temanan relata na e sistema di pago.

Acceso na y uzo di servicionan financiero of inclusion financiero ta parti di e maneho economico di Ministerio di Asuntonan Economico, Comunicacion y Desaroyo Sostenibel. Diferente publicacionnan di Banco Central di Aruba ta muestra cu aunke e acceso y uso di servicionan financiero ta relativamente halto na Aruba tin espacio pa stimula esaki cu lo trece mas beneficio pa desaroyo economico di Aruba.

Como parti di su maneho economico Minister Geoffrey Wever a elabora riba diferente iniciativanan pa stimula acceso na y uzo di servicionan financiero. Pa stimula acceso na financiamiento como un producto financiero a establece e Agri Fund pa duna prestamonan na un interes abao na agricultornan comercial. Pa garantiza cu tur ciudadanonan y companianan



tin un cuenta basico bancario di pago, e Lansverorderening Basisbetaalrekening ta rumbo pa Parlamento.

Educacion financiero tambe ta prioridad di maneho pa stimula acceso na y uzo di servicionan financiero. Pa stimula e conocimiento financiero riba budgeting, spaarmento, inversion y debe personal, e di dos edicion di Finansa den mi Hogar ta den ehecucion den tur distrito di Aruba. E prome edicion di e proyecto Finansa den mi Hogar a start den 2022, a wordo ofreci gratis den tur distrito y a termina diahuebs venidero den distrito di Santa Cruz. Mas cu 300 ciudadano a participa na e curso Finansa den mi Hogar. Pa proteha consumidornan di entre otro interes halto pa credito, e ley regeling consumentenkrediet a drenta na vigor riba 16 di juni 2022. Actualmente ta den proceso pa determina e tasa di interes pa creditonan di consumo. Tambe pa stimula un cultura di spaar, minister Geoffrey Wever a lanza recientemente e “National Children Savings Program”.

Pa stimula inclusion financiero a corto y largo plazo un “National Council for Financial Inclusion and Education” lo tin e tarea di traha e maneho integral riba esaki.

Minister Geoffrey Wever ta felicita Banco Central di Aruba pa e tremendo iniciativa di organisa e di dos edicion di e Foro di Pago Nacional. ■■■



DIMAS A LANSA SU PROYECTO DI MAS NOBO ESTA E "SELF PAYMENT KIOSK"



Recientemente, Minister di Husticia y Asuntonan Social sr. Rocco Tjon, tawata na departamento di DIMAS, caminda a lansa e proyecto nobo di "self payment kiosk" caminda ta digitalisa procesonan pa asina mitiga cu erornan por wordo cometi y alabes mehora e servicio cu ta wordo brinda na clientenan.

A introduci e proyecto aki, mirando cu e ta importante pa como gobierno y como un departamento gubernamental esta DIMAS, e servicio cu ta wordo brinda ta uno bon. Na final di dia, ora bo brinda un bon servicio, e ta bira menos posibel pa como organisacion bo ta suseptibel pa corrupcion.

E proyecto aki ta e prome fase, y lo sigui wordo amplia pa asina mas tanto posibel procesonan por wordo digitalisa, y di e forma ey ta brinda, no solamente un miho servicio, pero e chens cu erornan ta wordo cometi tambe ta bira menos.

Otro siman, lo tin un ekipo di Hulanda na Aruba, y hunto cu e leiding di DIMAS lo bay audit henter e organisacion, pa asina percursa cu tur procesonan por ta procesonan eficiente y di e forma ey por sigui mehora e servicio cu ta wordo brinda na henter nos comunidad.

A gradici ex minister sr. Glenbert Croes, cu a bin ta traha riba e proyecto aki pa hopi tempo y cu awo a keda finalisa y a wordo ehecuta. Tambe a gradici directora di DIMAS sra. Kathy Paskel y henter e ekipo di DIMAS, kende a haci esaki un realidad. Ta trata di un proceso riguroso caminda mester a traha hunto cu diferente socionan pa por a logra esaki. Por ultimo, a gradici tambe Algun persona specifico cu ta e motornan clave tras di e proyecto aki, esta sr. Mario Wever, Sr. de Cuba, sr. Edgar Arends, sra. Jennifer Tromp, IBS y XATECH.





Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD